

## **EFW Wanderwuche in Meiringe 2017**

Ich chan eifach am Afang scho nüt anders säge –  
Diä weiss nüd wie vielti Wuche, tuet eifach wiä immer wieder fäge

Wiä viel Stunde händ dä Oskar und Hansruedi wieder uf sich gno  
Dass mir alli voller Vorfreud chönd da in Meiringe zäme cho

Ä so schöni Wanderige und tolli Unterkunft- äs isch dä Hit  
Da chömed doch alli gärn jedes Jahr wieder mit

Oski, au wänn d`Ziit nüd immer mit em Computer übereinstimmt, oh wei, oh wei, oh wei  
So sind mir doch all Tag na wiit vor em z`Nacht wieder dihei

Weisch, mir Fraue tüend nüd gärn dur d`Gägend hetze  
Mir wänd doch d`Wiibärgschnägge rette und nüd eifach verletze

Und wiä mängi Minute händ mir dank üserem tifique Mathis ii g`spart  
Wänn är immer zum öffne und wieder ihänke vo dä Weidhäg isch parat

D`Gruppe zwei sind bi dä Innertkirche-Bahn dänn scho na höchi Gescht  
Händ doch diä Bähner hüt für eu dä Wage äxtra g`wäsche ganz fescht

Dä Hansruedi als Chef des Innern und vo dä Gruppe zwei  
Wär hett das dänkt, lat doch diä g`liäbte Liederbüechli eifach dihei

Aber dä, nüd verläge, stimmt eifach jede Abig äs Liäd a  
Und mir g`horsame Wanderer singed ihm sälbverständlich fählerlos na

Äs isch wiederum nüd sälbverständlich, nei  
Dass mir wieder ohni Unfall und Chranket chönd hei

Schön isch es au das Jahr wieder, wiä jedes sin Teil hät biitreit  
Dass mir ä Wuche hinder üüs händ, voller Heiterkeit

Härzliche Dank an alli, äm Hansruedi und Oskar allne vora  
Dass mir`s wieder ä so schön händ chöne ha